



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
19 Maiu 2014

Suku Vatu-Boro ezije referendum ba Lei Pensaun Vitalisia atraves hosi treinamentu JSMP kona-ba Prosesu Lei no Demokrasi

Partisipantes sira iha treinamentu JSMP kona-ba demokrasia, prosesu halo lei no kna'ar orgaun soberanu sira nian iha Suku Vatu-Boro, Sub-Distritu Maubara, Distritu Liquiça, Iha 15 Maiu 2014 ezije ba estadu atu halo referendum ba Lei Pensaun Vitalisia tanba sira hare lei ne'e favorese deit ba estrutura eis titulares orgaun soberanu sira no ignora interese komum.

Treinamentu loron ida ne'e partisipa hosi ema hamutuk nain 30 kompostu husi fetu ema nain 15 no mane ema nain 15 mai hosi estrutura suku, representante grupu fetu, estudante, joventude fetu no mane inklui comunidade sira.

“Atividade treinamentu ne'e hanesan ativadade kontinuasaun hosi JSMP, liu-liu atu hasa'e koñesimentu comunidade nian kona-ba demokrasia, prosesu halo lei inklui fó informasaun jerál kona-ba kna'ar prinsipal órgaun soberanu Estadu Timor-Leste nian inkuli lei sira ne'ebé parlamentu sira produs, aprova no promulga hosi Prezidente Repúblika,” dehan Diretór Ezekutivu JSMP Luis de Oliveira Sampaio.

Paulino Maria dos Santos, nu'udar partisipantes husu ba estadu atu halo referendum ba Lei Pensaun Vitalisia tanba observa katak lei ne'e fó benefisiu deit ba eis titulares sira. Nia haktuir liutan katak iha kampaña politika lideransa partidu

sira promove atu halo alterasaun ba lei refere depois kaer ukun, maibé ikus manan elisaun sira ignora tiha sira nia promesa tanba ne'e nia ezije ba estadu liuliu ba Paralementu Nasionál no Prezidente da Repúblika atu uza nia knar tuir artigu 66 konstituisaun hodi halo referendum ba lei ne'e antes ba elisaun jerál 2017.

Xefe Suku Vatu-Boro, Lucas Maria dos Santos, lori comunidade sira nia naran agredese ba JSMP tanba bele fahe informasaun importante sira ne'e iha sirania suku nune'e, bele aumenta tan koñesimentu comunidade nian kona-ba servisu órgaun soberanu estadu nian iha Timor Leste.

Treinamentu ne'e, hetan antusiasmu husi partisipante sira no rekomenda ba JSMP atu bele hato'o sira nia ejizensia ba Parlamentu Nasionál (PN). Sira husu ba PN atu halo fiskalizaun too iha sira nia aldeia no suku hodi hatene sira nia difikuldades moris lor-loron nian inklui ejize ba parlamentu atu bele altera lalais Lei Pensaun Vitalísia tuir promesa ne'ebé sira halo durante kampaña partidu polítika ba elisaun jéral.

Treinamentu ne'e remata ho fahe manual treinamentu ba partisipante sira hodi distribui tutan ba comunidade sira seluk ne'ebé la partisipa. JSMP mós informa ba partisipante sira katak, iha tinan ne'e JSMP sei realiza Semináriu Nasionál iha Dili hodi konvida fila fali representantes suku atu hasoru malu ho deputadu sira.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Telefone: 3323883|77295795

Diresaun e-mail: luis@jsmp.minihub.org

info@jsmp.minihub.org

Website: www.jsmp.tl

Face book: www.facebook.com/timorleste.jsmp